

- प्रधानमंत्री नरेन्द्र मोदी जयपुर ऊं 46 हजार 300 करोड़ रुपया ऊं बत्ता खर्च वाळी 24 परियोजनावां रो उद्घाटन कीनो अर नींव रखी।
- प्रधानमंत्री भजनलाल सरकार रा एक साल रा कामकाज ने ऐतिहासिक बतायो—कह्यो—पार्वती—कालीसिंध—चंबल लिंक परियोजना ऊं प्रदेश मांय पाणी री परेशानी हमेशा सारु दूर व्हेला।
- लोकसभा मांय आज “एक राष्ट्र—एक चुनाव” ऊं जुड़यो बिल पेश करी ज्यो।
- प्रदेश मांय घणखर ठोड़ां दिन री बगत ई पारो उत्तरण ऊं ठण्ड रो असर बध्यो।

000

प्रधानमंत्री नरेन्द्र मोदी आज जयपुर मांय बिजली, पाणी, सड़क अर रेलवे ऊं जुड़ी 46 हजार 300 करोड़ रुपया ऊं बत्ता खर्च री 24 परियोजनावां रो उद्घाटन कीनो अर नींव रखी। श्री मोदी आज प्रदेश री मौजूदा सरकार रा कामकाज रो एक साल पूरो व्हेवण रा सिलसिला मांय जयपुर कने दादिया मांय राख्यी ज्या कार्यकम मांय बोल रह्या हा। वे 11 हजार करोड़ रुपया ऊं बत्ता खर्च वाळी 9 परियोजनावां रो उद्घाटन कीनो, ज्यां मांय 7 केंद्र री अर 2 राज्य सरकार री है। प्रधानमंत्री 35 हजार 300 करोड़ रुपया ऊं बत्ता खर्च री 15 परियोजनावां रा काम री सुरुआत कीनी। आं मांय राजस्थान अर मध्यप्रदेश, दोन्यू राज्यां सारु खास पार्वती—कालीसिंध—चंबल लिंक परियोजना ई शामिल है। ई परियोजना सारु प्रधानमंत्री री मौजूदगी मांय मध्यप्रदेश अर राजस्थान बीचे करार माथे सही करी ज्यी। प्रधानमंत्री कह्यो के पार्वती—कालीसिंध—चंबल लिंक परियोजना ऊं राजस्थान मांय पाणी री परेशानी हमेशा सारु दूर व्हे जावेला। वे कह्यो के ई परियोजना ऊं न केवल निवेश बधेला बल्कि नौजवानां ने नौकरी—धंधा रा अणगिणत मौका मिलेला। श्री मोदी कह्यो के ई परियोजना ऊं राजस्थान अर मध्यप्रदेश रो विकास तेजी ऊं व्हेला।

-----

श्री मोदी कह्यो के केंद्र मांय कांग्रेस री अगुवाई वाळा राज मांय राज्यां बीचे पाणी ऊं जुड़या झगड़ा—टंटा नी सुलझ सक्या, ज्यी कारण संबंधित राज्यां ने घणो नुकसान व्ह्यो। वे कह्यो के केंद्र री मौजूदा सरकार रो झगड़ा—टंटा रे बजाए समाधान माथे जोर है। वे कह्यो के मध्यप्रदेश अर राजस्थान बीचे व्ह्या करार ऊं दूजा राज्यां ने ई सीख लेवणी चाहिजे।

-----

प्रधानमंत्री कह्यो के पाणी बचावणो मौजूदा बगत री जरूरत है अर ई सारु देश रा हर रेहवासी ने योगदान देवणो चाहिजे। प्रधानमंत्री कह्यो के केई राज्यां मांय जनता री भागीदारी ऊं मोटी तादाद मांय बिरखा रो पाणी बचावण रा ढांचा बणाया जा रह्या है। राज्य री भजन लाल सरकार रा काम री सराहवणा करता थकां वे कह्यो के प्रदेश मांय लारला एक साल मांय ऐतिहासिक काम व्ह्यो है।

वे कह्यो के राज्य री लारली कांग्रेस सरकार घणो अन्याय कीनो। प्रधानमंत्री कह्यो के भाजपा सरकार एक साल मांय मोटी तादाद मांय भर्तियां निकाळी, साफगोई सागे परीक्षा करायी ज्यी अर नौकरियां दीरीजी।

-----

कार्यक्रम मांय मुख्यमंत्री भजन लाल शर्मा कह्यो के आज रो दिन ऐतिहासिक है। वे राज्य सरकार रा लारला एक साल रा कामकाज रो जिकर करता थकां कह्यो के सरकार ईमानदारी ऊं हर तबका री जनता री सेवा करण री कोशिश कीनी है।

-----

कार्यक्रम ने मध्यप्रदेश रा मुख्यमंत्री मोहन लाल यादव अर केंद्रीय जल शक्ति मंत्री सी. आर. पाटिल ई संबोधित कीना। ई मौके राज्य मंत्रिमंडल रा सदस्य, केंद्रीय मंत्री अर भाजपा रा केई आला नेता अर विधायक मौजूद रह्या। प्रधानमंत्री रो भाषण सुणबा सारु प्रदेश भर ऊं मोटी तादाद मांय लोग जयपुर पूग्या। कार्यक्रम रो जिला स्तर माथे सीधो प्रसारण करी ज्यो, जिण ने जनता रा नुमाइंदा, अहलकार अर जनता उमाव ऊं देख्यो।

000

लोकसभा मांय आज “एक राष्ट्र—एक चुनाव” ऊं जुड़्या दो बिल पेश करी ज्या। केन्द्रीय कानून मंत्री अर्जुनराम मेघवाल संविधान मांय 129वो संशोधन बिल—2024 अर केन्द्रशासित प्रदेश विधि संशोधन बिल—2024 सदन मांय पेश कीनो। बिल पेश कर्यां पाछे विपक्ष रा सदस्यां री मांग परां मत विभाजन करी ज्यो। 269 सदस्य इण रा पक्ष मांय अर 198 सदस्य खिलाफ वोट दीनो। कांग्रेस, टीएमसी, समाजवादी पार्टी, डीएमके, शिवसेना उद्धव ठाकरे गुट अर मार्क्सवादी कम्युनिस्ट पार्टी समेत विपक्ष री पार्टियां बिल पेश करण रो विरोध करता थकां इण ने संविधान रा बुनियादी ढांचा माथे प्रहार बतायो। विपक्ष ई बिल ने जांच सारु संयुक्त संसदीय समिति ने भेजण री मांग कीनी। श्री मेघवाल विपक्ष रा आरोप रो खण्डन करता थकां कह्यो के ओ बिल संविधान रा मूल ढांचा रे खिलाफ नी है। वे आं बिलां ने संयुक्त संसदीय समिति कने भेजण रो प्रस्ताव कीनो।

000

जैसलमेर मांय 21 दिसम्बर ने जीएसटी काउंसिल री 55वीं मीटिंग राख्यी जावेला। जिला कलेक्टर प्रताप सिंह ई री तैयारियां रो जायजो लेवण सारु आज अहलकारां सागे चर्चा कीनी अर जरूरी हुकम दीना।

000

प्रदेश मांय घणखर ठोड़ां दिन री बगत ई पारो उतरण ऊं ठण्ड रो असर और बध ग्यो है। लारला चौबीस घंटा मांय राजधानी जयपुर समेत 17 ठोड़ां दिन री बगत पारो सामान्य ऊं नीचे दर्ज करी ज्यो। फतेहपुर मांय रात री बगत पारो लारला छह दिन ताई शून्य ऊं नीचे रह्यां पाछे आज अढ़ाई डिग्री सेल्सियस रिकॉर्ड करी ज्यो। आज करौली राज्य मांय सब ऊं ठण्डी ठौड़ रह्यो, जठे कमती कम तापमान 1 दशमलव 3 डिग्री सेल्सियस नापी ज्यो। संगरिया मांय 3 दशमलव 4, सीकर मांय 3 दशमलव 7, माउंट आबू अर चूरू मांय 4, अलवर मांय 4 दशमलव 2, श्रीगंगानगर अर धौलपुर मांय 4 दशमलव 8 अर नागौर मांय 5 दशमलव 1 डिग्री सेल्सियस तापमान रिकॉर्ड करी ज्यो। सवाईमाधोपुर, भीलवाडा, उदयपुर, चित्तौड़गढ़ अर जालौर मांय ई ज़ोरदार ठण्ड पड़ रही है। म्हाणा झुंझुनू खबरनवीस बतायो के जिला रा गांवाई हलकां मांय आज संवारे बर्फ री परत निजर आयी।

-----

ई बीचे मौसम विभाग काल एक कमज़ोर आतूणी विक्षोभ रा असर ऊं न्यूनतम तापमान मांय मामूली गिरावट रा आसार जताया है। महकमा रे मुजब राज्य मांय शीतलहर रो दौर आवता 4—5 दिन ताई चालतो रेहवण री संभावना है। मौसम विभाग 20 दिसम्बर ऊं कोटा अर भरतपुर संभाग मांय संवारे री पोर कठे—कठे घणो कोहरो रेहवण री शंका जतायी है।

000

प्रदेश मांय ठण्ड बधबा सागे ई राज्य सरकार ढांढा-ढोरां ने सर्दी ऊं बचावण सारू एडवाइजरी जारी कीनी है। पशुपालन अर डेयरी मंत्री जोराराम कुमावत पशुपालकां ऊं ढांढा ने रात री बगत खुला मांय नी बांधण अर सूखो चारो अर मोटो अनाज खिलावण री अपील कीनी।

000

प्रदेश मांय 31 जनवरी 2025 तांई लगाया जा रह्या मुख्यमंत्री आयुष्मान आरोग्य शिविरां मांय टी.बी., ब्लड प्रेशर, शुगर, कैंसर अर दूजी बीमारियां री जांच करी जा रही है। केकड़ी मांय आज लगायी ज्या शिविर मांय मोटी तादाद मांय लोग स्वास्थ्य जांच करायी। झुंझुनूं मांय लगायी ज्या शिविर रो मुख्य चिकित्सा अर स्वास्थ्य अधिकारी औचक दौरो कीनो। वे गैर-हाजिर कर्मचारियां ने नोटिस जारी कीना। सवाईमाधोपुर जिला रा मित्रपुरा, खिरनी, भगवतगढ़ अर कुंडेरा समेत न्यारी-न्यारी ठोड़ां राख्यी ज्या शिविरां मांय आस वाळी लुगाइयां री स्वास्थ्य जांच करीजी अर बच्चां रे टीका लगायी ज्या।

000

स्कूली विद्यार्थियां मांय स्वास्थ्य रा प्रति जाग जगावण सारू 'ईट राइट इनीशिएटिव' रा तैत डीग जिला री हर स्कूल मांय हेल्थ क्लब बणायो जावेला। जिला शिक्षा अधिकारी मनोज खुराना आ जाणकारी दीनी। वे बतायो के क्लब मांय स्कूल लेवल माथे नोडल अधिकारी रा तौर ऊं एक शिक्षक अर हर कक्षा ऊं एक छात्र प्रतिनिधि समेत 15 सदस्य शामिल व्हेला।

000